

CASTAGNETI

Innò serà statu un pichju
L'ombra era verde
Innò serà statu un pichju
L'ombra era verde è pagna
Spenserata
L'asgiu hè sempre traditu
Da sogni ammutuliti
Issi scuchji sò chjucuti
È burlati da passi
Tamanti
Giganti ùn ci n'hè più...

Innò serà statu un pichju
L'ombra era verde
Innò serà statu un pichju
L'ombra era verde è pagna
Spenserata
L'asgiu hè sempre traditu
Da sogni ammutuliti
Musconi indispettiti
Azezi d'avè persu u cummandu
Giganti ùn ci n'hè più...

Ai modu à pichjà
Ùn ti risponderanu
Castagnette incriniate
È chjoppule si sbaccanu
A filetta s'hè sparta
Hè scrittura arcana
A i chjocchi d'un pichju...

Giganti ùn ci n'hè più...

DOLCE SETTEMBRE

Dolce Settembre
Ai u nome di u tempu
Cum'è una manu liscia chì scrinerà
Capelli biondi cum'è ricordi
U core chì l'ammenta
A si allonga à cantà

Dolce Settembre
Ai u nome di u tempu
À l'alitu di a notte
E stelle ùn sò chete
Da sopra à l'acqua viva
A lucenda chì spira
Indarnu chjamerà

Dolce Settembre
Ai u nome d'idee
Vittime di e pistole cionche à u to cantà

Dolce Settembre
I zenni sò stampati
Da sopra à lu so aggrancu
Mutu cum'è granitu
A stantara chì ride

L'ACELLI DI U MARE

L'acelli d'ind'è voltanu
L'ale carche à memoria di sponde orientale
Duve canta a sultana piatta in l'ombra verdogna
L'acelli d'inde voltanu

L'acelli d'inde voltanu
L'acelli d'inde voltanu u so volu hè mandile
Strappatu à u core rosu da tanti inganni
L'acelli d'ind'è voltanu

E sò donna chì v`à è sò donna cchì v`à
Ver di tanti destini

L'acelli induve vanu
Chì spiccanu lu volu sopra à facce funeste
Secche di malamorte, prumessa d'un ritornu
L'acelli induve vanu

E so donna chì v`à....

E so donna chì v`à ver di tanti destini trapuntati à ferite
U mo core hè macagna s'averà persu i sogni
Chì u fecenu altagna

PISCADORI DI DESTINI

N'avemu mille
E mille miglioni
N'avemu mille
È mille miglioni
Di miglioni di mila
Piscadori
À piscà li pensieri
Intricciati à u tempu

N'avemu mille
È mille miglioni
Di miglioni di mila
I pastori
À curà le so bande
Di sogni vagabondi

N'avemu mille
È mille miglioni
Di miglioni di mila
I rimiti
À l'entre di i deserti
Di u core in tribizona

N'avemu mille
È mille miglioni
Di miglioni di mila
Donne ardite
À annannà paure
Di l'anima picondria

Ma destin
Pellegrinu
Ùn avemu chè unu...
Da fà.

UNA SORTE DA SCRIVE

Biancu
Cum'è a schjuma spumata à l'altu
Biancu
È i scogli dilacerati
Voltanu
À u granacciu
U grombulu...
L'infinitesimale
Piantu di u delfinu

Chì chjama chjama
Nantu à a sponda spettinata
Chì chjama chjama
Da e burriane anziane
Chì portanu dumane...

Bianca
Bench'è techja di sangue
È tandu chì mi face l'orrore
Di i mo sogni persi
S'ellu si pò un ghjornu
S'ellu si pò un ghjornu
Rifà Atene è Sparta
È una tutta mente è l'altra tutta forza
Ma surelle
È surelle di picciu
Surelle
D'una pace listessa...

LARICI

Sò pieni à cose è cose
Stanzine è sulaghjoli
Sò pieni à cose è cose
Stanzine è sulaghjoli
Ma l'orizonti vioti
Ùn sò s'è tuù ai vistu
Passà ci i battelli
Chì u tempu s'inghjotte ?

Malfidà si di u ventu
Chì strascina brame
Ghjunte da u marosu

Anu carene stanche
È vele allusinite
Anu carene stanche
È vele allusinite
A brama di viaghjà
A brama di viaghjà
O l'anu tale è quale
Cum'è una volta quandu
Quand'elli funu larici
Quand'elli funu larici
Liati
A a rocca

Malfidà si di u ventu
Chì strascina brame
Ghjunte da u marosu...

LA NAVE VÀ

È la nave

Fantasia

Ma Fellini

A camera s'hè viota

U to sguardu s'hè spintu

Ma Ghjelsumina canta

Ballarina da strada

Salta pè le fiure

Chì u filmu sbucina

È la nave v`a

È la nave

Dolce vita

Vinu acetu

Un brindisi amaru

Ci lampa in Roma eterna

Cinecittà Fellini

S'hè incruchjata à a morte

Ingrisgisce u catrame

Nantu à u mare di Rimini

È la nave v`a...

A Voce

Isse voce eranu facce
È cori è persone
Di pastori à l'aguattu
D'un penseru eternu
Quellu chì fece Atene
Troia, Alba è po Roma
Ghjerusalemme fonte
È Venezia di l'onda...

Isse voce eranu filu
Chì strappava e fruntiere
Ci s'hè zuccata Auropa
Maghreb è po Livante
Ci hà scrittu u so sboccu
U stradone di l'ambra
U Talmud è a Bibbia
I detti di u Curanu...

Isse voce eranu petra
Griviglie di u stentu
Suchju di l'oliu fine
A rosula di i venti
Ind'è l'ortu marinu
È tanti serinati
Chì sprichjanu in la notte
À l'ore di l'amore
A fruntiera si sgrigna

Cum'è ghicciu di u tempu
Ideale hè a curva
In cima di u marosu
A funa sente u viaghju
À u molu ch'infrebba
Ci hè tanti avveni novi
À chì face isse voce...

TEMPURALI

Acqua

Ventu

È nuli

È nebbia...

Sbatte a teghja scimignulita

Si ferma l'anima acuttumita

Seguita u sguardu a fronda lebbia

Chì corre è casca l'annuttà

Sdrughjerà ancu u celu

Stasera o Petru Pà ?

Acqua

Ventu

È nuli

È nebbia...

Fochi chì sbottanu è si sfocanu

Scuchji dumati in lu brusgià

Vette incese è chì vocanu

In core

I cori inghjuliati in l'agrancu

Di u ceppu neru chì si sface

Siccherà ancu u locu

Stasera o Petru Pà .

PARULLE AUSTINE

Ci anderemu dinù
À isse ciccone d'ombra
Chì anu inventatu l'ora
Di i to basgi mutali

À passi rinviviti
Cunchiglia di a to vita
Chì accatizza a fiara ?
Ci anderemu dinù...

E frasche rimurose
Aprenu u to scuzzale
Tondu cum'è un vascellu
Sottu un celu di cetera
A to voce s'attonda
Ci deremu à sbramà
Ci anderemu dinù...

À cincinà pughjali
Mentre l'aghje sviutate
Dicenu i ghjorni corti

Si sò ferme quassù
Nantu à issu muru frustu
Chì picciava u matticciu
E parolle d'agostu.

SIGNURETTA

È u ghjornu chì luce
In u sprichju di risa
U to sguardu arditu
S'avia da ammattà

Sò stonde appese à stonde
Duve hè frusta a petra
Cun passi mille è libecci lagnosi
Un volenu stancià

O s'è ùn avia à tè u mondu era sguillitu
À l'abissi di l'ombra ci era da vucerà

Emu fattu verani
Infiuriti à cucchi
L'uva galletta canta memorie di quaiò
È u core s'appende à note di carrughju
A funa sbatte in terra
A funa sbatte in core...

O s'è ùn avia à tè u mondu era sguillitu
À l'abissi di l'ombra ci era da vucerà

Hè funa di i to ghjochi
Zitella di a piazza
Passi di signuretta
Ci era da spasimà
Sottu à e palme mischine
Piazza San Niculà.

O Signuretta !

